

BiH je potreban demokratski dijalog u vezi sa evropskim integracijama



Evropska budućnost Bosne i Hercegovine nije projekat koji se odvija između političke elite i Evropske unije, već to zahtijeva angažovanost i punu podršku svih dijelova društva, rekao je danas visoki predstavnik i specijalni predstavnik EU Miroslav Lajčak.

«Za razliku od drugih zemalja koje su se pridružile Evropskoj uniji, BiH do sada nije uspjela da realizuje šire učešće u procesu integracije», rekao je ambasador Lajčak na konferenciji održanoj u Sarajevu.

«Sedamdeset posto građana stalno izjavljuje da žele da se BiH priključi Evropi što prije, ali 70 posto građana nije aktivno uključeno u ostvarenje tog cilja», rekao je Lajčak. «Do sada su odgovornost za proces evropskih integracija u potpunosti prepuštali političkom vođstvu. A rezultati su bili skromni».

Visoki predstavnik i specijalni predstavnik EU Miroslav Lajčák, zajedno sa šefom Delegacije Evropske komisije Dimitrisom Kourkoulasom, i slovenačkom ambasadoricom Natašom Vodusek, u svojstvu predsjedavajućeg EU, obratili su se prisutnima u uvodnom dijelu konferencije koja predstavlja početak kampanje kojom se građani BiH pozivaju da se aktivno uključe u proces evropskih integracija.

Kampanja, koja će obuhvatiti javne diskusije, biće provedena u naredna dva mjeseca u 16 gradova i mjesta širom Bosne

i Hercegovine.

„Parafiranje Sporazuma o stabilizaciji i pridruživanju prošlog decembra bio je važan korak u pravom smjeru – ali ja i drugi predstavnici EU morali smo ubijediti političko vođstvo da učini šta je potrebno. U drugim zemljama kandidatima za prijem u EU, političko vođstvo je lobiralo za EU – a ne obratno!“ rekao je ambasador Lajčak.

Lajčak je istakao da jedan od nedostataka, kada je riječ o naporima koje je BiH do sada poduzimala na integraciji u EU, leži u „neuspjehu da se integracija poveže sa praktičnim poboljšanjima koja utiču na životni standard“ te je dodao da konstruktivna debata, među širim slojevima društva, o pitanju integracije treba biti fokusirana na to kako će članstvo u EU „ojačati sigurnost i demokratiju u BiH, poboljšati ekonomsku klimu, potaknuti ulaganja i otvaranje novih radnih mjesta, ojačati regionalni razvoj i saradnju te stvoriti mogućnosti za mlade i uvesti više standarde obrazovanja.“

Ambasador Lajčak je rekao da se javnom raspravom može „pokrenuti proces putem kojeg će stanovništvo prestati da šuti i početi da govori. Vrijeme je da se politički dijalog proširi. Naš sveobuhvatni cilj je učiniti ovu zemlju stabilnom, prosperitetnom, demokratskom i sigurnom i članicom EU. To je proces u kojem mora učestvovati cjelokupno društvo jer se to pitanje tiče svih nas; to je proces koji se može nastaviti sve dok se zemlja ne pridruži EU.“